

VLA, Urk. 8639
11. November 1582

Transkription:

Ich Hanns Frantz Zu Thorenbüren, unnd Im Oberdorff gesessen. Bekhenn offentlich Für mich All mein Erben, unnd Nachkhomen, unnd thun khundt. Aller meniglich mit dem Brieff, das ich mit wolbedachtem Synn und mut von meines bessern Nutz unnd Fromen Wegen, Dem Lieben Hailigen unnd marttner Sannt Sebaistian, Patron der Cappell Im oberdorff Zu Thorenbüren. unnd von der selben Pfleg wegen. Umb Zwaintzig guldin Reinisch In müntz gutter und genemer ditzs Landts Werung. Dero ich von dem Erberen Jung Göerg Franntzen. Von gemelter Cappell Aigen gutt und gelt. Also bar gewert. und bezalt bin. Unnd die an meinen guten Nutz khomen und gewendten Sind, Ainen Stätten vesten Ewigen Zinß unnd khouffs. uffrecht. unnd Redlich zu khauffen Gegeben hab. In Crafft ditzs brieffs. ain guldin Obgemelter Werung Rechts Stätts Järlichs unnd gewiss Ewigs Zinß unnd gelts Von Ausser unnd Ab meinem Aigen Hauß Hofstatt. unnd Weingartenn, Alles bey unnd An Ain Andern In Ainem Infanng Im Oberdorf. unnd In Schattow gelegen. Stosst obna An die Weppach gassen. Zu Andern An die Landtstraß. Zum drytten An den Stainenbach zum Vierten An Urichen Thurnhern. und Hannsen Bäsinger, Unnd Ausser Selichem Hauß Hofstatt und Weingarten. Unnd desselben Nutzen Früchtenn. rechten gerechtighaitenn Weitinen, mit grund boden gengen Stegen und wegen, mit Reben truettern, Und namlich mit. Allen Zu und Ingehörungen davon gantz nichts Außgenomen. Noch hindhan gesetzt. Auch Für Frey Ledig und Loß Außgenomen. Vorhin An die Cappell. Im Oberdorff Ain pfund Acht schilling pfennig. Me An die Cappell Ain pfund pfennig Alles Järlichs Zinß vorhin darab gatt. und gon soll. Nach Laut. und Inhalt. brieff und sigel Sonst und gegen meniglichenn Unverschrieben und Unverkhumbert. In Allweg Unnd Demnach sellenn und wellen ich All mein Erben und nachkhomen. So gemelt unnderpfandt. Imer Inhaben. der obgedachten Cappell. Allen Iren Innhabern. Pflegern. und Verwaltern. Unnd Allen Iren Nachkhomen den obgemeten guldin Järlichs Zinß. Nunhinfüro Järlich Auch Aines Jeden Jars Allain und besonder. Allweg uff Sant martins des Hailigen Bischoffstag. güttlich unnd Freunstlich Außrichten wehren. geben und bezallen, Unnd den Zu gedachten Cappell Innhabern Pflegern unnd Verwaltern. Zu Iren sichern Handen unnd gewalt. alhir Zu Thorenbüren antwurten. one Alle Minderung Abgang Costen unnd Schaden, Auch für Aller meniglichs ein und widerred Auch für Aller meniglichs verbieten Niederlegen und Entweren. Dann Wa ich oder meine erben Hier In Sümig Wäring, Und nit Zinßen würden. In maß Wie obsteet. So Habennd sy darnach Vollenn gewalt. Freyes urlob. unnd gute recht. mich mein erben, Ouch gemelt. Ir unnderpfandt. darumben An Zu greyffen Nöttenn, Hofften. pfrunden und vergannten. Alles nach des gerichts Zu Thorenbüren. geprauch. und Landtsrecht. unnd davon nit Lassen. Untz das Sy Allweg Inkhomen sind, Irs verfallnen Ausstendigen Zinß. Sampt. Erliettene Cöstenn und schaden, daruff davon Unnß nach gemelt. unnderpfandt, ganz und gar Nutz über All. soll schützen schirmen. Frieden Handhaben Noch gut. Sein Weder Gaistlich noch Weltlich Leüt noch gericht. noch Nuntz. Waß Jemand dafür Zu schirm Erdenckhen khan noch mag Indhain Weyß. Noch Weg. Unnd Hieruff ditzs khouffs und Zinß. sollenn und wöllen. ich All mein erben. und Nachkhomen. der obgedachten Cappell. und Iren Nachkhomen. pflegern und verwaltern. Ir Recht. gut. getruw Wehren. Hayssen und sein, Für All Abgenng Intrag und Ansprach. nach dem rechten Allfart. In unnserm Costen. Unnd one Iren schaden, Unnd Wie Woll disser Kuff Ain ewiger Kuff Außweist Unnd Sagt. so ist. mir dannocht die gnad Beschechen. das ich All mein erben. und Nachkhomen, dissen Järlichen Zinß wol wider. khouffen und Ablössenn muegen, Nun Hinfüro welches Jars wir wellind, doch allweg uff ob bestimpten Sant. Martins Tag, und mit. dem Haupt. gut. und mit. den Erloffnen und unbezalten Zinsen, und mit. gutter Müntz und Landts Werung, Alles getrülich unnd ungevarlich Unnd des Alles Zu Warem Vestem Urkhund, So han ich obgenannter Hanns Frantz. mit. Vleyß Und Ernst. Erpetten. Den Ersamen Bernharten Wächinger, der Zeit. unnser Genedigisten Herschafft Zu Österreich, irer Aman, Zu Thorenbüren, das er Sein Aigen Innsigel. Für mich und All mein erben (.doch der Herschafft Auch Ime Aman und seinen erben In Allweg one schaden.) offennlich gehenckht. Hatt An den Brief, Der geben ist. An Sant. Martins des Hailigen Bischoffstag Nach Christi gepurt gezellt. Fünff Zechenn Hundert. Achtzig, unnd Zway Jar,

Rückseite:

Hannß Franz Im Oberdorf zinst 1fl
1582 Nov. 11.
Dieser Brief ist In Cräfften
Zinst Jetz Adam Kalb